

# Dapli transparenza ed effizienza

La regenza prenda posizun tar in'incumbensa parlamentara da deputada Vera Stiffler (PLD, Cuira)

DA MARTIN CABALZAR/FMR

**■ La regenza n'è betg pronta d'acceptar in'incumbensa parlamentara da la deputada liberaldemocratica Vera Stiffler che pretenda in'examinaziun da la collavuraziun tranter l'uffizi per economia e turissem cun ils partenaris turistics.** Cun sia incumbensa metta deputada *Vera Stiffler* (PLD, Cuira), sustegnida da 74 collegas, en dumonda las structuras actualas per la promozion dal turissem grischun sco era la surdada d'incaricas da prestaziun e las contribuizions finanzialas correspondentes. Plinavant vulessan ils incumbensaders meglirar la strategia e pretendan da la regenza da preschentiar mesiras d'optimizar la collavuraziun da l'Uffizi chantunal d'economia e turissem cun ils partenaris turistics. Per quest intent duai la regenza preschentiar in rapport al Cussegli grond.

## Per dapli transparenza e dirigibladad

Sco quai che la moziunara Stiffler constatescha, surdat il chantun differentas incaricas da prestaziun per commercializar e promover il turissem. Differentas participaziuns cruschadas d'uniuns, organisaziuns ed interpresas cun incumbensas paregliables effectueschian ch'adina las medemas persunas profiteschian da talas incaricas. Igl existia uschia il privilegio che la promozion statale daventia intransparenta, nunsurvesaivla e greva da diriger. En quest connex sa tschentia perquai era la dumonda sche las usanzas tar la surdada da lavurs publicas veginan observadas. Da l'autra vart è deputada Stiffler era da l'avis che cunzunt Grischun Vacanzas porschia da nov era servetschs che

concurrenzeschian furniturs da servetschs da l'economia privata. Al Cussegli grond manchia tar la tractaziun dal preventiv la survista davart las incaricas da prestaziun surdadas dal chantun, pretenda Stiffler. Perquai sa tschentia la dumonda sche las structuras existentes stoppien veginir simplifitgadas, la survista meglierada, las incaricas da prestaziun formuladas en moda pli concreta, e sche la strategia stoppia veginir reponderada.

## Examinaziun da las structuras e da la strategia n'è betg necessaria

En sia posizun fa la regenza valair ch'il svilup turistic da vart dal chantun veginia tigrà da l'uffizi per economia e turissem

sin basa da la lescha per promover il svilup economic messa en vigur 2016. Ils instruments ils pli impurtants sajan la promozion da l'infrastructura, d'arranschaments, la realisaziun da las mesiras federalas (Nova politica regiunala), plinavant la promozion da l'organisaziun da marketing Grischun Vacanzas sco era da la marca regiunala «graubünden». Cun stgaffir ils dus credits d'impegn per il program da turissem 2014–2023 e per las «infrastructuras relevantas per il system» haja il Cussegli grond tschentà accents impurtants per la politica da turissem. En il program da la regenza 2021–2024 dertermescha il punct central da svilup «Diversificaziun en il turissem»

plinavant las mesiras strategicas per ils proxims onns. Sco tar il svilup economic valia da differenziar en la realisaziun operativa tranter las atgnas incumbensas chantunales ed il sostegn da projects da terzas persunas cun contribuziuns.

## Transparenza e controlla èn garantidas

La regenza punctuescha che per las competenzas finanzialas valian er tar l'uffizi per la promozion d'economia e turissem las medemas prescripcziuns legalas da finanzas sco tar tut ils uffizis chantunals. Da respectar saja era l'ordinaziun davart las finamiras da «public corporate governance» che pretenda che las finanzas da tut ils uffizis veginan controlladas periodicament da la controllo da finanzas. Dal reminent sajan las contribuziuns per Grischun Vacanzas e per la marca Grischun veginidas concedidas resp. surdadas pervi da la gronda summa da la regenza e betg da l'uffizi u dal departament: L'impurta finamira da questas incumbensas da prestaziun saja da gudagnar novi giasts e tals che returnan adina puspl. Tenor la regenza na dovri perquai betg ulteriuras mesiras per examinar las structuras u ils currents finanzials.

Dal reminent dettia era la homepage da l'uffizi d'economia e turissem ina buona survista davart la collavuraziun cun ils differents partenaris turistics e lur incumbensas. Era qua è la regenza da l'avis che la transparenza saja gronda avunda. La regenza controlleschia cuntinuadament la surdada da las incumbensas resp. las contribuziuns sco er las incaricas da prestaziun respectivas dals differents acturs sin champ turistic.



La deputada *Vera Stiffler* (PLD, Cuira) vuless dapli transparenza tar l'uffizi d'economia e turissem.

FOTO SOMEDIA